

HARIAN METRO

Sorok di hutan elak ditahan

Norizuan Shamsuddin
norizuan@hmetro.com.my

■ Kumpulan kaki judi leka bermain bola golek, sabung ayam dicekup

Petaling Jaya

Sekumpulan kaki judi yang leka bermain bola golek dan menyabung ayam bertempiran melarikan diri meredah hutan selepas polis mengempur markas kegiatan berkenaan di dalam sebuah belukar berdekatan kawasan setinggian di Bukit Damansara Perdana, semalam.

Dalam serbuan kira-kira jam 12.30 tengah hari itu, seramai 14 individu termasuk seorang wanita dan remaja berusia 13 tahun ditahan Bahagian Anti-maksiat, Perjudian dan Gangsterisme (D7) Ibu Pejabat Polis Kontinjen (IPK) Selangor.

Asisten Superintendan Pengawasan D7 Selangor, Sobri Baki yang mengetuai serbuan berkata, pihaknya melakukan risikan selama dua minggu sebelum 23 pegawai dan anggota dikerahkan bagi

FAKTA
14 individu termasuk wanita dan remaja berusia 13 tahun ditahan



PENGANJUR dan kaki judi ditahan.

membuat serbuan berkenaan.

"Dua lelaki warga tempatan turut ditahan dan disyaki penganjur judi bola golek.

"Kita turut menahan seorang remaja lelaki berusia 13 tahun bersama bapanya

yang juga warga tempatan. Siasatan awal mendapati remaja terbabit masih bersekolah dan datang ke lokasi berkenaan bersama bapanya yang berusia 40-an.

"Manakala, suspek wanita warga Indonesia pula ber-

tindak sebagai penjaga gerai makan yang terdapat di lokasi markas judi terbabit," katanya ketika ditemui di lokasi serbuan berkenaan, semalam.

Menurut Sobri, hasil serbuan itu, pihaknya turut me-

rampas 10 ayam dan peralatan judi bola golek serta wang tunai berjumlah RM11,884.

Katanya, berdasarkan risikan, pihaknya mendapati markas judi terbabit aktif sejak dua bulan lalu dan di-

lengkapi dengan gelanggang sabung ayam, pondok judi bola golek serta gerai makan.

"Aktiviti pertaruhan di markas judi terbabit dijalankan pada hujung minggu dan cuti umum bermula jam 12 tengah hari sehingga 6 petang, kebanyakan yang menyertainya adalah penghuni dari kawasan setinggian berdekatan.

"Kumpulan berkenaan juga turut memantau setiap kaki judi yang masuk ke kawasan itu bagi mengelak dikesan polis," katanya.

Menurutnya, semua suspek berusia 13 hingga 65 tahun berkenaan kemudian dibawa ke Balai Polis Kota Damansara untuk siasatan lanjut.

Siasatan dijalankan mengikut Seksyen 44 Akta Binatang 1953, Seksyen 6(1)(c) Akta Imigresen 1963, Seksyen 7(1) Akta Rumah Judi Terbuka 1953 dan Seksyen 7(2) akta sama.